

МОНГОЛ УЛСЫН ХУУЛЬ

202... оны ... сарын ... өдөр

Улаанбаатар хот

ШИЛЭН ДАНСНЫ ТУХАЙ /Шинэчилсэн найруулга/

НЭГДҮГЭЭР БҮЛЭГ НИЙТЛЭГ ҮНДЭСЛЭЛ

1 дүгээр зүйл.Хуулийн зорилт

1.1.Энэ хуулийн зорилт нь улс, орон нутгийн төсөв, улсын болон орон нутгийн өмчийн хөрөнгийг үр ашигтай захиран зарцуулах зорилгоор төсвийн удирдлагыг хэрэгжүүлэх шийдвэр, үйл ажиллагаа ил тод, нээлттэй, ойлгомжтой байх, түүнд олон нийт хяналт тавих мэдээллийн тогтолцоо /цаашид “шилэн данс” гэх/-г бүрдүүлэхэд оршино.

2 дугаар зүйл.Шилэн дансны тухай хууль тогтоомж

2.1.Шилэн дансны тухай хууль тогтоомж нь Монгол Улсын Үндсэн хууль, Төсвийн тухай хууль, Мэдээллийн ил тод байдал ба мэдээлэл авах эрхийн тухай хууль, Төрийн болон орон нутгийн өмчийн хөрөнгөөр бараа, ажил, үйлчилгээ худалдан авах тухай хууль, энэ хууль болон эдгээр хуультай нийцүүлэн гаргасан хууль тогтоомжийн бусад актаас бүрдэнэ.

2.2.Монгол Улсын олон улсын гэрээнд энэ хуульд зааснаас өөрөөр заасан бол олон улсын гэрээний заалтыг дагаж мөрдөнө.

3 дугаар зүйл.Хуулийн үйлчлэх хүрээ

3.1.Дараахь эрх зүйн этгээд, түүний эд хөрөнгө захиран зарцуулах эрх бүхий албан тушаалтан энэ хуулийн үйлчлэлд хамаарна:

3.1.1.төрийн болон орон нутгийн өмчит нийтийн эрх зүйн хуулийн этгээд:

3.1.1.а.төрийн байгууллага, албан газар;

3.1.1.б.нийтийн байгууллага.

3.1.2.төрийн болон орон нутгийн өмчит, төрийн болон орон нутгийн өмчийн оролцоотой хувийн эрх зүйн хуулийн этгээд:

3.1.2.а.хяналтын багц буюу түүнээс дээш хэмжээний хувьцааг нь төр, орон нутаг болон тэдгээрийн нэгдмэл сонирхолтой этгээд эзэмшиж байгаа компани;

3.1.2.б.улс, орон нутгийн төсвийн орлогыг бүрдүүлдэг том аж ахуйн нэгжийн ангилалд багтдаг, эсхүл төрөөс үйл ажиллагааны татаас, санхүүгийн батлан даалт, олон улсын зээл тусламжийн хөтөлбөр хэрэгжүүлж байгаа төрийн болон орон нутгийн өмчийн оролцоо 33 хувь буюу түүнээс бага аж ахуйн нэгж, байгууллага;

3.1.3.засгийн газар, орон нутгийн тусгай сан,

3.1.4.улс, орон нутгийн төсвийн хөрөнгөөр хөрөнгө оруулалт, төсөл, хөтөлбөр, арга хэмжээ, ажил, үйлчилгээ гүйцэтгэж байгаа этгээд;

3.1.5.төрийн чиг үүргийг хууль болон нийтийн эрх зүйн гэрээний үндсэн дээр шилжүүлэн авсан этгээд.

3.2.Энэ хуульд дараах төсөв, санхүүгийн үйл ажиллагааны төлөвлөлт, гүйцэтгэл, хэрэгжилт, тайлагнал эдгээртэй холбоотой мөнгөн болон бусад гүйлгээ хамаарна:

3.2.1.улс, орон нутгийн төсөв;

3.2.2.орон нутгийн хөгжлийн сан;

3.2.3.Засгийн газар, орон нутгийн тусгай сан;

3.2.4.төрийн болон орон нутгийн өмчийн хөрөнгөөр бараа, ажил, үйлчилгээ худалдан авах үйл ажиллагаа;

3.2.5.Засгийн газар, орон нутгийн өр, авлага үүсгэсэн шийдвэр, түүнтэй адилтгах санхүүгийн бусад хэрэгсэл;

3.2.6.Засгийн газар, орон нутгийн гадаад болон дотоод зээл, буцалтгүй тусламж;

3.2.7.төр, хувийн хэвшлийн түншлэл, концесс;

3.2.8.тусламж, хандив.

3.3.Төрийн нууцад хамаарах төсөв, үндэсний аюулгүй байдлыг хангахтай холбогдсон гүйцэтгэх ажил эрхлэх эрх бүхий байгууллагын гүйцэтгэх ажилтай холбоотой төсвийн төлөвлөлт, гүйцэтгэл, хэрэгжилт, тайлагнал энэ хуульд хамаарахгүй.

3.4.Төрийн нууцад хамаарахаас бусад төсвийн төлөвлөлт, гүйцэтгэл, хэрэгжилт, тайлагналыг байгууллагын нууцад хамааруулан нийтэд мэдээлэхээс зайлсхийхийг хориглоно.

4 дүгээр зүйл.Шилэн дансны зарчим

4.1.Энэ хуулийг хэрэгжүүлэхэд дараах зарчмыг баримтална:

4.1.1.мэдээлэл үнэн зөв, бодитой, иж бүрэн байх;

4.1.2.мэдээлэл ойлгомжтой, ач холбогдолтой байх;

4.1.3.тогтоосон хугацаанд, тогтмол, шуурхай мэдээлдэг байх;

4.1.4.хуулийн дагуу нууцад хамааруулснаас бусад бүх мэдээлэл нээлттэй байх.

ХОЁРДУГААР БҮЛЭГ ШИЛЭН ДАНСНЫ СТАНДАРТ

5 дугаар зүйл.Шилэн дансны мэдээлэл хүргэх хэлбэр

5.1.Байгууллага нь шилэн дансны мэдээллийг өөрийн цахим хуудсаар хүргэх бөгөөд цахим хуудас нь дараах шаардлагыг хангасан байна:

5.1.1.шилэн дансны бие даасан цэстэй байх;

5.1.2.мэдээлэл татаж авах, хэвлэх боломжтой байх;

5.1.3.тодруулга өгөх албан тушаалтны нэр, утас, цахим хаягийг байршуулсан байх;

5.1.4.мэдээллийг тогтмол шинэчилж байх, өөрчлөлт орсон тухай бүр өмнөх мэдээллийг цахим хуудасны архивт хадгалах, архивын мэдээллийн санд нэвтрэх, татаж авах, хэвлэх боломжтой байх.

5.2.Шилэн дансны мэдээллийг дуу болон дүрс бичлэгийн хэлбэрээр байрлуулж болно.

5.3.Энэ хуулийг хэрэгжүүлэхтэй холбоотойгоор шилэн дансны нэгдсэн цахим хуудастай байна. Шилэн дансны нэгдсэн цахим хуудсыг санхүү, төсвийн асуудал эрхэлсэн төрийн захиргааны төв байгууллага эрхлэн хөтөлнө.

5.4.Энэ хуулийн 5.1, 5.3-т заасан цахим хуудсанд тавигдах нийтлэг стандарт, агуулга, мэдээлэл тавих журам, хэлбэрийг санхүү, төсвийн асуудал эрхэлсэн төрийн захиргааны төв байгууллагын саналыг үндэслэн Засгийн газар батална.

5.5.Шилэн дансны нэгдсэн цахим хуудасны цэс нь энэ хуулийн 3.2-т заасан ангиллыг баримталсан байх бөгөөд мэдээллийг бүрэн тусгасан байна.

5.6.Энэ хуулийн 3.2.5-3.2.8-д заасан шийдвэр шилэн дансны нэгдсэн цахим хуудаст байршсанаар хүчин төгөлдөр болно.

5.7.Орон нутгийн төсөв, түүний төсвийн захирагчийн шилэн дансны мэдээллийг энэ хуулийн 5.1-д заасан цахим хуудастай эсэхээс үл хамааран тухайн байгууллагын мэдээллийн самбарт байрлуулна.

5.8.Мэдээллийн самбар нь олон нийт мэдээлэлтэй чөлөөтэй танилцах боломжийг хангасан, түүнд тавигдсан мэдээлэл нь энэ хуулийн 7 дугаар зүйлд заасан албан тушаалтны гарын үсгээр баталгаажсан байна.

6 дугаар зүйл.Шилэн дансны мэдээлэл

6.1.Энэ хуулийн 3.1.1, 3.1.3-т заасан байгууллага, албан тушаалтан дараахь мэдээллийг тогтоосон хугацаанд мэдээлнэ:

6.1.1.тухайн жилийн батлагдсан төсвийн талаарх дор дурдсан мэдээллийг жил бүрийн 01 дүгээр сарын 10-ны өдрийн дотор;

6.1.1.а.Улсын болон аймаг, нийслэлийн төсвийн ерөнхийлөн захирагчийн тухайн жилд хэрэгжүүлэх хөтөлбөр, хөтөлбөрийн хүрэх үр дүнгийн талаарх чанарын болон тоо хэмжээний үзүүлэлт;

6.1.1.б.төрийн болон орон нутгийн өмчийн хөрөнгөөр бараа, ажил, үйлчилгээ худалдан авах ажиллагааны төлөвлөгөө;

6.1.1.в.төсвийн эх үүсвэр, орлого, зарлагыг дэлгэрэнгүй ангиллаар;

6.1.1.г.хөрөнгө оруулалтын төсөл, арга хэмжээний жагсаалт;

6.1.1.д.орон нутгийн хөгжлийн сангийн төлөвлөлт.

6.1.2.тухайн жилийн батлагдсан болон нэмэлт төсвийн сар, улирлын гүйцэтгэлийг дараа сарын 08-ны өдрийн дотор, хагас жилийн гүйцэтгэлийг жил бүрийн 08 дугаар сарын 15-ны өдрийн дотор, өмнөх оны төсвийн гүйцэтгэлийг жил бүрийн 04 дүгээр сарын 25-ны өдрийн дотор;

6.1.2.а.энэ хуулийн 6.1.1.а-д заасан хөтөлбөрийн биелэлт;

6.1.2.б.төсвийн гүйцэтгэлийг батлагдсан төсвийн төлөвлөгөөтэй харьцуулсан харьцуулалт, холбогдох тайлбарын хамт;

6.1.2.в.мөнгөн болон мөнгөн бус хэлбэрээр хүлээн авсан хандив, тусламж, түүний зарцуулалт, холбогдох шийдвэр;

6.1.2.г.худалдан авах ажиллагааны тайлан;

6.1.2.д.хөрөнгө оруулалтын зарлага, санхүүжилтийг төсөл, объект тус бүрээр;

6.1.2.е.орон нутгийн хөгжлийн сангийн гүйцэтгэл;

6.1.2.ё.нэмэлт төсвийн орлого, зарцуулалт, түүнтэй холбогдох шийдвэр;

6.1.2.ж.тусгай сангийн орлого, хөрөнгийн зарцуулалт, гүйцэтгэл, санхүүжүүлсэн төсөл, арга хэмжээний мэдээлэл, түүнтэй холбогдох шийдвэр;

6.1.3.дор дурдсан мэдээллийг тухайн шийдвэр гарсан, эсхүл үйл ажиллагаа хэрэгжсэнээс хойш долоо хоногийн дотор:

6.1.3.а.Улсын Их Хурал болон тухайн шатны иргэдийн Төлөөлөгчдийн Хуралд өргөн мэдүүлсэн жилийн төсвийн төсөл, батлагдсан төсвийн тодотголыг тайлбарын хамт;

6.1.3.б.тендер шалгаруулалтын ерөнхий мэдээлэл, тендерт оролцогчийн нэр, тендер шалгаруулалтын дүн;

6.1.3.в.Энэ хуулийн 6.1.3.б-д зааснаас бусад сонгон шалгаруулалтын үр дүн;

6.1.3.г.байгууллагын дансны мэдээлэл;

6.1.3.д.цалингийн зардлаас бусад орлого, зарлагын гүйлгээний дэлгэрэнгүй мэдээлэл;

6.1.3.е.байгууллагын батлагдсан орон тоонд орсон өөрчлөлт;

6.1.3.ё.байгууллагын хуулийн этгээдийн бүртгэлийн мэдээлэлд орсон өөрчлөлт;

6.1.3.ж.Засгийн газар, орон нутгийн зээл, буцалтгүй тусламж олгосон шийдвэр;

6.1.3.з. санхүүгийн тайлангаар баталгаажсан өглөг, авлагын дэлгэрэнгүй жагсаалт;

6.1.3.и.төр, хувийн хэвшлийн түншлэлийн гэрээ;

6.1.3.й.Төрийн өмчийн эд хөрөнгийг актлах, устгах, шилжүүлэх, шийдвэр, хэлцэл;

6.1.3.к.төсөв зарцуулах эрхээ шилжүүлсэн аливаа шийдвэр;

6.1.3.л.тусгай сангийн эх үүсвэр, зарцуулалтын батлагдсан дүн.

6.2.Санхүү, төсвийн асуудал эрхэлсэн төрийн захиргааны төв байгууллага энэ хуулийн 6.1-д зааснаас гадна дараахь мэдээллийг мэдээлнэ:

6.2.1.Монгол Улсын нэгдсэн төсвийн төлөвлөгөө, гүйцэтгэл, тайлбарын хамт сар бүрийн 15-ны өдрийн дотор өссөн дүнгээр;

6.2.2.Хөрөнгө оруулалтын төсөл, арга хэмжээний төлөвлөгөө, гүйцэтгэлийг тухай бүр;

6.2.3.Засгийн газрын гадаад зээл, тусламжийн ашиглалтын мэдээг төсөл, хөтөлбөр, санхүүжүүлэгч байгууллагаар улирал бүр;

6.2.4.Засгийн газрын гадаад, дотоод өрийн бүтэц, өрийн зориулалт, дундаж хугацаа, хүү, төлбөрийн мэдээллийг улирал бүр;

6.2.5.улсын төсвийн нэгдсэн үзүүлэлтийг макро эдийн засгийн үзүүлэлт, холбогдох бусад үзүүлэлттэй уялдуулсан судалгаа, тооцоог улирал бүр.

6.3. Концессын асуудал эрхэлсэн төрийн захиргааны байгууллага энэ хуулийн 6.1-д заасан мэдээллээс гадна дараахь мэдээллийг долоо хоногийн дотор мэдээлнэ:

6.3.1.концессын зүйлийн жагсаалт болон түүнд оруулсан нэмэлт, өөрчлөлтийг батлагдсанаас хойш;

6.3.2.концессын гэрээ болон түүнд оруулсан нэмэлт, өөрчлөлтийг гэрээ байгуулагдсанаас хойш;

6.3.3.концессын гэрээ байгуулснаас хойш концесс эзэмшигч, түүний байгууллагын нууцад хамаарахаас бусад мэдээлэл, концессын зүйл, гүйцэтгэх ажил, үзүүлэх үйлчилгээний талаарх мэдээлэл.

6.4.Тухайн шатны төсвийн захирагч төсвийн хэрэгжилт, гүйцэтгэлд хийсэн хяналт, тайлагналын талаар дараахь мэдээллийг долоо хоногийн дотор мэдээлнэ:

6.4.1.хагас жилийн санхүүгийн тайлан болон жилийн эцсийн санхүүгийн тайланг гаргаснаас хойш;

6.4.2.аудит хийсэн жилийн эцсийн санхүүгийн тайлан, санхүүгийн нэгтгэсэн тайланг аудитын дүгнэлтийн бүрэн эхийн хамт, бусад төрлийн аудитын тайлан, дүгнэлт, хяналт шалгалтын дүнг хүлээн авснаас хойш;

6.4.3. энэ хуулийн 6.4.2-т заасан аудитын тайлан, дүгнэлт, хяналт шалгалтын дүнд тусгагдсан асуудлаар авч хэрэгжүүлсэн арга хэмжээ;

6.4.4.Нэгдсэн төсвийн гүйцэтгэл, Засгийн газрын өрийн тайлан, Засгийн газрын санхүүгийн нэгтгэсэн тайланд аудит хийснээс хойш;

6.4.5.Төсвийн ерөнхийлөн захирагчийн худалдан авах ажиллагааны төлөвлөгөөний хэрэгжилтийн үнэлгээ гаргаснаас хойш ;

6.4.6.Төсөв, санхүүгийн шийдвэр гаргадаг зөвлөл болон хөндлөнгийн хяналт тавих бүтэц, түүнд хамаарах албан тушаалтны талаар мэдээлэл, томилсон шийдвэр.

6.5.Энэ хуулийн 3.1.2-т заасан байгууллагын дараахь мэдээллийг тогтоосон хугацаанд нийтэд мэдээлнэ:

6.5.1.төлөвлөгөө, төлөвлөлттэй холбоотой дор дурдсан мэдээллийг жил бүрийн 1 дүгээр сарын 20-ны дотор:

6.5.1.а.тухайн байгууллагын зорилтот түвшин;

6.5.1.б.худалдан авах ажиллагааны төлөвлөгөө;

6.5.1.г.хөрөнгө оруулалтын төсөл, арга хэмжээний төлөвлөгөө, концессын зүйлийн жагсаалт;

6.5.2.энэ хуулийн 6.5.1-д заасан мэдээллийн гүйцэтгэлтэй холбоотой дараахь мэдээллийг дор дурдсан хугацааны дагуу:

6.5.2.а.зорилтот түвшний гүйцэтгэлийн улирлын мэдээг дараа сарын 15, хагас жилийн мэдээг 7 дугаар сарын 25, бүтэн жилийн мэдээг дараа оны 2 дугаар сарын 15-ны дотор;

6.5.2.б.мөнгөн болон мөнгөн бус хэлбэрээр хүлээн авсан, олгосон хандив, тусламж, түүний зарцуулалтын хагас жилийн тайланг холбогдох шийдвэрийн хамт 8 дугаар сарын 15-ны дотор, жилийн тайланг дараа оны 4 дүгээр сарын 25-ны дотор;

6.5.2.в.худалдан авах ажиллагааны тайланг дараа жилийн 1 дүгээр сарын 15-ны дотор;

6.5.2.г.хөрөнгө оруулалтын төсөл, арга хэмжээний гүйцэтгэлийн сар, улирал, хагас болон бүтэн жилийн мэдээг дараа сарын 8-ны дотор;

6.5.2.д.хөнгөлттэй нөхцөлтэй болон бодлогын зээлийн чанарын мэдээг улирал бүр дараа сарын 8-ны дотор;

6.5.2.е.улс орон нутгийн төсөвт төвлөрүүлж буй татварын болон татварын бус орлогын улирлын мэдээг дараа сарын 15, хагас жилийн мэдээг 7 дугаар сарын 25, бүтэн жилийн мэдээг дараа оны 2 дугаар сарын 15-ны дотор;

6.5.2.ё.өмч, хөрөнгийн өөрчлөлтийн талаарх мэдээллийг холбогдох шийдвэрийн хамт хагас жилээр 7 дугаар сарын 25, бүтэн жилээр дараа оны 2 дугаар сарын 15-ны дотор;

6.5.3.дараахь мэдээллийг тухайн шийдвэр гарсан, үйл ажиллагаа хэрэгжсэнээс хойш долоо хоногийн дотор:

6.5.3.а.тухайн жилийн зорилтот түвшинд орсон нэмэлт, өөрчлөлт;

6.5.3.б.байгууллагын хуулийн этгээдийн бүртгэлийн мэдээлэлд орсон өөрчлөлт;

6.5.3.в.Төрийн болон орон нутгийн өмчийн хөрөнгөөр бараа, ажил, үйлчилгээ худалдан авах ажиллагааны тухай хуулийн дагуу гүйцэтгэх тендер шалгаруулалтын ерөнхий мэдээлэл, тендер оролцогчийн нэр, тендер шалгаруулалтын дүн;

6.5.3.г.энэ хуулийн 6.5.3.в-д зааснаас бусад сонгон шалгаруулалтын үр дүн;

6.5.3.д.тухайн байгууллагад холбогдох энэ хуулийн 3.2.5, 3.2.7-д заасан шийдвэр;

6.5.3.е.худалдан авах ажиллагааны төлөвлөгөөний нэмэлт, өөрчлөлт;

6.5.3.ё.хөрөнгө оруулалтын төсөл, арга хэмжээний төлөвлөгөө, концессын зүйлийн жагсаалтын нэмэлт, өөрчлөлт;

6.5.3.ж.төр болон орон нутаг тавь буюу түүнээс дээш хувийг эзэмшиж байгаа компанийн хийсэн их хэмжээний хэлцэл, түүнд тооцогдохуйц баталгаа, батлан даалт;

6.5.3.з.Төлөөлөн удирдах зөвлөл, хяналтын зөвлөлийн гишүүн, гүйцэтгэх удирдлагын урамшуулал, цалингийн хэмжээг тогтоосон шийдвэр;

6.5.4.санхүүгийн хэрэгжилт, гүйцэтгэлд хийсэн хяналт, тайлагналын талаар дараахь мэдээллийг долоо хоногийн дотор:

6.5.4.а.хагас жилийн санхүүгийн тайлан болон жилийн эцсийн санхүүгийн тайланг гаргаснаас хойш;

6.5.4.б.аудит хийсэн жилийн эцсийн санхүүгийн тайланг аудитын дүгнэлтийн бүрэн эхийн хамт хүлээн авснаас хойш;

6.5.4.в.эрх бүхий байгууллагын хяналт шалгалтын дүнг хүлээн авснаас хойш;

6.5.4.г.энэ хуулийн 6.5.4.б, 6.5.4.в-д заасан хяналт шалгалтын дүнгийн хэрэгжилтийг тухайн шийдвэрт тогтоосон хугацаанаас хойш;

6.6.Арван сая төгрөгөөс дээш үнийн дүнгээр улс, орон нутгийн төсөв, Засгийн газрын болон орон нутгийн тусгай зориулалтын сан, орон нутгийн хөгжлийн сангийн хөрөнгө оруулалт, санхүүжилт, Засгийн газар, түүний харьяа байгууллагаас гаргасан бонд, үнэт цаас, өрийн бичиг, баталгаа, төр, хувийн хэвшлийн түншлэлийн гэрээний дагуу хэрэгжүүлж байгаа төсөл, хөтөлбөр, арга хэмжээний дагуу санхүүжиж байгаа энэ хуулийн 3.1.4, 3.1.5-д заасан этгээд нь нийт төсөвт өртөг, хэрэгжилтийн явц, үе шат, зарлага, санхүүжилтийн мэдээллийг олон нийтийн цахим хуудас, өөрийн цахим хуудсаар давхар мэдээлж болно. Мэдээллийг төсвийн байгууллагын цахим хуудас, мэдээллийн самбарт байрлуулахад энэ хуулийн 3.1.4, 3.1.5-д заасан этгээд төлбөр төлөхгүй.

6.7.Эрх бүхий этгээд аливаа төсөв, өмч, хөрөнгө зарцуулахтай холбогдох шийдвэр гаргах, гэрээ байгуулахдаа ашиг сонирхлын зөрчил бүхий нөхцөл үүссэн тохиолдолд Нийтийн албанд нийтийн болон хувийн ашиг сонирхлыг зохицуулах, ашиг сонирхлын зөрчлөөс урьдчилан сэргийлэх тухай хуулийн 8, 9 дүгээр зүйлд заасан мэдэгдлийг бичгээр гаргаж 7 хоногийн дотор мэдээлнэ.

6.8.Энэ хуулийн 6.5.3.в дэх заалт Төрийн болон орон нутгийн өмчийн хөрөнгөөр бараа, ажил, үйлчилгээ худалдан авах ажиллагааны тухай хуулийн дагуу тендер шалгаруулалт зохион байгуулдаг энэ хуулийн 3.1.2-т заасан этгээдэд хамаарна.

7 дугаар зүйл.Мэдээлэх албан тушаалтан

7.1. Шилэн дансны мэдээллийг энэ хуулийн дагуу иргэн олон нийтэд хүргэх үүргийг дараахь албан тушаалтан хүлээнэ:

7.1.1. Засгийн газрын бонд, зээл, өрийн бичиг, баталгаа, түүнтэй адилтгах санхүүгийн бусад хэрэгсэл, төр, хувийн хэвшлийн түншлэлийн гэрээ, концесс, төсөв, өмч, хөрөнгө, мөнгө зарцуулах, өр, авлага, худалдан авах үйл ажиллагаатай холбоотой аливаа шийдвэр гаргасан, гарын үсэг зурсан эрх бүхий албан тушаалтан;

7.1.2. Энэ хуулийн 7.1.1-д заасан эрх бүхий албан тушаалтан бүрэн эрхээ хэрэгжүүлэхэд нь хөндлөнгөөс нөлөөлсөн албан тушаалтан;

7.1.3. Тухайн зарлага, төлбөрийн даалгаварт нэгдүгээр, хоёрдугаар гарын үсэг зурж гүйлгээ хийсэн албан тушаалтан.

7.2. Энэ хуулийн 7.1-д заасан эрх бүхий албан тушаалтан мэдээлэх үүргээ бусдад шилжүүлсэн нь түүнийг хариуцлагаас чөлөөлөх үндэслэл болохгүй.

7.3. Энэ хуулийн 3.1 дэх хэсэгт заасан байгууллага шилэн дансны мэдээллийг энэ хуулийн дагуу иргэн олон нийтэд хүргэх үүргийг өөрийн дотоод зохион байгуулалтын нэгжээр гүйцэтгүүлж болно.

ГУРАВДУГААР БҮЛЭГ ШИЛЭН ДАНСНЫ ХЯНАЛТ, ХАРИУЦЛАГА

8 дугаар зүйл. Хуулийн хэрэгжилтэд тавих хяналт

8.1. Энэ хуулийн 3.1-д заасан этгээдийн шилэн дансны үйл ажиллагаанд тавих хөндлөнгийн хяналтыг бүх шатны иргэдийн Төлөөлөгчдийн Хурал, иргэдийн Нийтийн Хурал, төрийн аудитын байгууллага хэрэгжүүлнэ. Иргэдийн Төлөөлөгчдийн Хурал, Иргэдийн Нийтийн Хурлын хяналт тавих үйл ажиллагааны журмыг төрийн аудитын дээд байгууллага боловсруулан баталж мөрдүүлнэ.

8.2. Энэ хуулийн 3.1.1, 3.1.2, 3.1.3-т заасан байгууллага, албан тушаалтны шилэн дансны үйл ажиллагаанд тавих дотоод хяналтыг Төсвийн тухай хуулийн 69 дүгээр зүйлд заасны дагуу төсвийн ерөнхийлөн захирагч хэрэгжүүлнэ.

8.3. Төрийн аудитын байгууллага нь өөрийн санаачилгаар шилэн дансны мэдээлэлд аудит хийж болно.

8.4. Байгууллага, албан тушаалтны ажлын тайланг дүгнэх, дээд шатны байгууллагаас хяналт шалгалт хийхдээ энэ хуулийн хэрэгжилтийг гол үзүүлэлт болгоно.

9 дүгээр зүйл. Иргэний хяналт

9.1. Энэ хуулийн хэрэгжилтийн явц, шилэн дансны мэдээллийн зөрчил, дутагдал болон шаардлагыг байгууллага, албан тушаалтан хүлээн аваагүй бол энэ талаарх гомдол, мэдээллийг иргэн, хуулийн этгээд Иргэдээс төрийн байгууллага, албан тушаалтанд гаргасан өргөдөл, гомдлыг шийдвэрлэх тухай хуульд заасан журмын дагуу төрийн аудитын байгууллагад гаргах бөгөөд энэ хуулийн үйлчлэлд хамаарах байгууллагын үйл ажиллагаанд аудитын дүгнэлт гаргуулах хүсэлт гаргаж болно.

9.2. Төрийн аудитын байгууллага нь гомдол, мэдээллийн дагуу тодорхой арга хэмжээ авч, үр дүнг тухайн иргэнд бичгээр болон олон нийтэд мэдээлнэ.

9.3.Иргэн, хуулийн этгээдийн татвар төлөгчийн эрх ашиг зөрчигдсөн гэж үзвэл захиргааны хэргийн шүүхэд гомдол гаргах эрхтэй.

10 дугаар зүйл.Хууль зөрчигчид хүлээлгэх хариуцлага

10.1.Энэ хуулийг зөрчсөн албан тушаалтны үйлдэл нь гэмт хэргийн шинжгүй бол Төрийн албаны тухай болон Хөдөлмөрийн тухай хуульд заасан хариуцлага хүлээлгэнэ.

11 дүгээр зүйл.Хууль хүчин төгөлдөр болох

11.1.Энэ хуулийг 202... оны ... дүгээр сарын ...-ний өдрөөс эхлэн дагаж мөрдөнө.

МОНГОЛ УЛСЫН ИХ ХУРЛЫН ДАРГА

Г.ЗАНДАНШАТАР